

算

谷

文

鈔

質谷文鈔卷十一

海昌查揆梅史著

玉人天際之齋銘

似花非花中有天地瓊館悅魂玉賢警寐褰帷雲來斂袂月  
避曹衣宛轉唐梯十二是耶非耶其人天際天際伊何常羊  
京華屈戌細戶犀釘鈿車唾花苔上夢痕烟遮有時星夜何  
處天涯窗前朱鳥壑底修蛇冠劔丁年繡襦甲帳住忉利天  
證秘密藏哀絛歌離良金寫狀宅心闔野役神綺障是曰情  
至匪直跌宕人亦有言情乃生文佳銘羅鞞妙記錄帟悒深  
如慕悲往若醺紅墻銀漢佳人碧雲霓裳笑語傾耳如聞天  
風海濤黃姑織女春夢漣心地行仙侶合歡堂前莫愁湖渚

芍藥幽懷芙蓉隱語東海揚塵渺渺愁余

賢母圖贊

并序

夫劉向七篇貌笄珈於四堵荀勗六法狀婉婉於兩圖通其  
義斯法誠垂焉類其事則家慶備焉是以子居依仇謝稚寫  
其停機范遠過侃何澄形其截髮屏障所傳與箴銘竝麗丹  
青之妙乃雅頌同陳豈徒蘇稷屏風一雙舞鶴敬休屋壁三  
疊霓裳古雲襲伯以世職居京官於所居雲繪園之西別構  
五楹以奉太夫人既落成值太夫人壽日屬其友邗上朱君  
本畫古賢母爲障而揆爲之贊夫命士以上父子異宮通侯  
之家甲乙置第紗幔不隔立虞氏之養堂洞簫既謚贊宣城  
之畫壁太夫人顧而樂之如山如河宛娣姒之成行是母是  
子詎古今之難及不辭摘藻遂引其端

公父文伯母贊

勤則不匱不違日昃沃土之喻發彼有的左嬪頌言宣尼歎息以歎之家而主猶續

雋不疑母贊

三輔五原廬兒馳騁京兆按部游俠繫頸不疑之賢延年之獷兩母相值有幸不幸

房景伯母贊

嫗來謁吏兒負其親尹來謁母民蔑其倫兩母合食答之以神堂上使君堂下細民

潘孟陽母贊

國士之目如犀燭淵同官爲僚母曰勉旃末坐之客是何卜

年飲酒食肉安知其賢

柳仲郢母贊

苦之爲用乃甘之母蓼耶荼耶味不在口賢母爲心亦如蠶  
曰誰則知之公綽之婦

歐陽文忠公母贊

廬江之水荻花參差卷然羊爪作鱗之而文章金石大放厥  
辭當其晝荻羣兒笑之

小檀欒室讀書圖贊

并序

讀書有記自王君懋始也講學有圖自蔡伯喈始也蓋將以  
寫蘿石之歡託丹青之契槃阿勿諉蒹葭宛在匪直邵堯夫  
之行窩殷仲堪之小屋已也小檀欒室在清平門之左拂塵  
庵之右十笏棲烟百弓選石重栢就嶂則丹霞可梯中霽承  
巖則玉乳可斲設松間之庖漏安月上之琴尊借樹支門因  
泉引筓一籬疎兩蘿未秋而已花四面涼陰衣不染而自綠  
嘉慶辛酉胡君元杲與其友讀書於此規牖補研擇蔭移牀  
一觴一詠巖壑恣其延緣半郭半村雲物誘其睽眴至於抱  
橐駝之迴岡睇鳳凰之崇巘海色入戶江聲撼空弔鐵幢射  
弩之雄發峴首沈碑之想作茲圖所以記萍迹也然而磨牛

陳跡轉眼都非飛鴻留痕逾時已杳相若干之宅便擬徙堂  
更晏嬰之居原嫌近市蓋此圖落墨之始卽同人移寓之初  
苔衣自碧而履綦無聲竹粉猶香而鬢眉盡去墅仍名謝墩  
已歸王風乾舊照之螢葉爛曾題之樹卽使好溪以成式得  
名穢里因士章寄諠而士鄉安託學臺就荒井記烟蕪宅銘  
蝸漫披卷裏之雲烟慨眼前之蕉鹿又何待草青南浦雲停  
東軒而後知江淹之銷魂陶公之搔首哉嗟乎欣戚之故係  
懷於今昔煙墨之態希情於水醴其事伊可述焉其人亦可  
贊也凡贊五

胡元杲字應元錢唐人

泊焉無朕窈然獨尋么絃未歇一士正襟味道之腴識秋之



心邈矣之子愛客若企古懷弼中俠骨在裏彼岑有苔曷云  
能已

范崇階字升之鎮海人寄籍錢唐

頎然者貌讀書一尺皤然者腹受墨一石斃肩斗酒誰主誰  
客狷潔其體綢直其狀不見客來獨隨霞往洞庭始波聆爾  
高唱

屠倬字孟昭山陰人寄籍錢唐

未見其人先聞其聲火色在面電氣貫睛客來四坐不問姓  
名著手管禿脫手研穿卽之奕奕挹之淵淵鳴琴在御忽復  
蹶然

及三慶字積堂錢唐人

炯炯河漢涓涓流澌匪秋伊夕若有所思偶影獨語誰則知  
之黃香弱年秦觀小友詩得其葩妍不能醜淡若秋菊脆如  
碧藕

查初揆字伯葵海寧人

其貧伊何吾無能名其狂伊何頗近人情揆曰伯葵後庚寅  
生不識齷鹽略知文字匹夫難奪四方之志髭而未髯年卅  
有四

禱雨祝辭

惟神與職共膺茲土所賴聰明庶民疾苦職之承乏亦有年所日雨日暘不聞怨恚以職之劣叢脞衰遲苟幸無過神實相之今茲農功已越夏五后土粵乾暑風交午奔走來告以令爲父令則民父神民之天天或怒之惟令之愆歲時將事案盛飭牽咎則在職夙夜不虔哀矜折獄恒失其情咎亦在職公或不明此或很鬥忘親聚慝彼或游惰罔知力穡誰實教之謂不在職凡職之咎亦旣孔多所不自知清夜云何繁惟職罪非民所任奈此田禾憔悴如燂灼民之苗如灼民心萋萋保社鼓聲將瘖神之愛民願其有秋念我邑氓半服田疇無大姦宄至不能排雖干神怒尙非其尤神怒顛蒙得請

於帝電激澤流揮斥屏翳滂沱載沛晷漏相繼沃我土膏滋  
我民困惟神之庸陰陽鼓盪用亦如龍無畏專擅非私伊公  
天道蕩蕩何患交訖苟或不然帝鑒厥衷神之卹民豈不如  
職惟是杲杲民畏其暹渥我惠我溝盈澮溢引領須臾待命  
孔亟

公祭廣平肅太守文代

李升齋觀察作

嗚呼維昔之夜蘊隆有赫瞻我民瘼憂心如炙急遞來告是何淹忽百年鶉鷄滿逝電驀所不能忘良二千石自我戾止言過其野甌窶汗邪暉於保社自我戾止言察其吏以恬以嬉徧於所暨咸曰太守知其所知經術飾治實先有司於時太息伊黃與龔予匡予糾盭爾在公苟裨於政何有異同自暑徂秋炎歊氣沴末疾間作消摩易遣胡不憇遺招旨謝馘韓魏之交氣悍俗慄斬勝於下南鷹北鷁武健嚴酷蟻蝨相弔太守獨否先咷後咲卒亦貼然如受劑約吁嗟已矣吏哭於舍民哭於衢謂太守慈俾我康娛如彼卵翼民則其雛如彼寒燠公則其襦何豐何歉恒若有餘或疑太守非吏而儒

玉珮長裾不利走趨沒世論定豈其然與嗚呼曩以宴娛習  
問生平媚學好古與俗拒撐斥絕滯濫傾耳莖蕪作為文章  
蕭瑟崢嶸揖濂抗洛小儒目瞠擊飛刺天孰肯自後擲堊索  
塗一起一仆作貢皇朝麟角鳳喙通籍農曹 帝命始筮持  
斧作牧宅師左右 睿皇初元蜀陝軍興隴州要衝芻輓相  
承徵發管箠閭閻勿勝搗竿負嶠一城驚競大府愕貽是在  
使能豈無百僚談笑捉麈魁磊偉岸噤不敢語太守慨然請  
以所部飛書城中問其疾苦無煩一矢百雉安堵誰謂太守  
而無才武旣第膚功 九重矜許日錫賚汝有纓其羽胡垤  
而躡胡淵而鸞上馬殺賊棄繻歸田旋起夕郎 察典稱賢  
一麾載出辨治平平偃蹇中外垂三十年未竟厥用詎曰非

天鳴呼方今盛際吏治脩明郡國之彥於赫厥聲鱗騰角起  
靡不驥駟惟我太守若無所爭委蛇進退與世距迎其所不  
可亦莫之行清靜卧理庶幾老成吁嗟已矣華皖之外曾無  
畱貽諸孤孫曾憔悴涕洟飄飄帷幕風淒其有饑在俎有  
醴盈卮覩縷輿頌匪哭以私哀哉尙饗

祭錢大中丞文

嗚呼古大臣邳張建鼓虔奉威稜金提化俗竝佐羲軒地典  
膺符乃分州絡夢爭王室韋元成之家聲力殫公家杜當陽  
之自敘以至賤璧輕珪問羊知馬靡宵匪且無深不淵有楊  
伯起之清白兼石恬侯之謹慎梁絲百斤生鈔山濤之受廐  
馬一匹死知董宣之貧若我 中丞公者非所謂抗迹餘風  
追踪前武者哉維公金陀舊里鐵券名家讀范孟博傳受教  
有由作賈長沙論其年尙少珪璋被遇文章受知倬直 機  
廷含毫 中禁張衡宏通建章之官可畫孔光淵默溫室之  
樹不言甫寄旬宣卽膺填撫借寇恂於河內召孔殲於嶺南  
緋衣魚袋特異華資玉帳虎韜兼鈐吳楚方圖牖民阜俗起



化培風而喬嶽雲昏箕尾曜暗天之奪公亦獨何哉嗚呼公  
生五十有三年耳幸際 隆平克副 委任將使樂歌粵舞  
水旱無聞警誦師箴靈蠹盡喻溝洫河渠盡倪寬之經術明  
堂月令見魏相之疏陳然後迴翔東閣延竚南衙韋丹政事  
方著錄於元和黃霸治才非息譽於京邑斷可知也卽不然  
而峻阪迴車中流輟棹乞領宮觀或備侍從將母心勞賜孝  
經全部著書事在作爾疋高臺續漢八表書爲唐六典波斯  
商人爭購白傅之集契丹使者多問路公之年優游終老其  
亦可也而蟬蛻泡幻驥奔景速人固甚疑公豈自料嗚呼擁  
麾建旄剖符擔爵位不可謂不貴矣銘鐘刊鼎懷金紆紫祿  
不可謂不厚矣顧餉鏡比清酌泉表滌旣無陸生好時之田

并少樂天履道之宅養堂七秩繼嗣十齡遺疏云爾知公心  
矣涼風號樹江聲撼空凡百僚案雪涕橫胸公之峻節公之  
公忠亦復何媿古大臣風哀哉尙饗

重修朱令公廟碑

國家丹青喬嶽蹈舞滄瀾壁往珪浮鵝來鰈踵分絲設菴嚴  
羣望於漢儀灑沈澹苗覈明禋於姬錄職是懷柔用致清晏  
夫含湖吐瀆靈則爲神備德蔽功祀於其社顧地長山君特  
主名於瑞應前胥後種祇合饗於雩禋琅邪東邁禺獮之圖  
畫無傳碣石北逾童律之纘承焉述絜古矩今軒此輕彼則  
神之靈明赫矣哉神姓朱氏諱彛生卒在宋治平崇寧間稟  
異非俗懷靈已仙天人畢降甲馬之聲滿空帝釋借來旃檀  
之香逼牖閱時今慧慕義若羶聞道夙因赴善如水有孟賁  
剽兇之氣兼牟尼飼虎之慈屬以饑饉具茲勇猛於越溯閩  
自雍及絳載膏之險方膺出盪之威已襲靈談鬼笑高歌夏

統之魃魚騰鯨吐豪劫澹臺之寶民殄已溺生寄神歸廟在

海寧袁花里神之鄉也紹興初封太尉寶祐二年封靈佑將

軍元大德三年封靈感宏祐公明永樂十六年御製遣祭國

朝勅建海神潮神廟皆以神配食駮壇有典褒歎頻仍歸墟

逾時尸祝或間蝸虬泣而跌沈蚣蝮蝕而懸闕盲風颯沓摧

畫壁之仙靈祆火熾炎燎依梁之燕雀乾隆五十九年夏富

媪鬻奇音兆髣髴靈圀竚迹光景炎歆重以上藥流渾神芝

樓栢黎白星奔輪蹶烟錯施捨金錢以若干計越數年前後

殿閣次第落成神之靈歟先是住持僧顯恒者湛深八解了

徹三塗棒下明心堂頭苦行華嚴法界邊梵唱於重霄批率

天宮丐布金於十地如是三年奄以圓寂庶幾幽贊抑亦冥

通或以顯默之地窅然難究化神之妙泊乎無名論元感則  
風雲可通語上契則聲聞多寂顧何以恍惚雲旗網縕霧市  
波喧號降雷動楚詛抑知儒言盛德佛說卽心上之可開寶  
於河宗下之可前席於宣室礪雲如蓋李左車霹靂停空春  
水連天馮將軍旌幢還里履綦曳丈人之跡泰山府君繡衣  
飄岳麓之風蒼水使者恭聞故實詎涉睽疑或以禋祀類分  
嶽公瀆侯殊其等昭應趣異佛日道月別其歸是以東海揚  
塵導蜺旌者萬騎西周侍曼搢玉笏者七分抑知昇元飛步  
何損尊嚴散髻斜簪詎形通悅玉纓瓊弁徵左史之浮夸鴻  
衣羽裳信酈亭之媼雅驂虬轡鯉變化何常樞水輪焱夷猶  
自得豈如元邱詭狀子文之骨何青渭水規圖付留之貌太

寢或以祖洲萬牒算葉難窮貝闕千珪析桐安辨鉅靈啓汾  
雁之祕元氣俱生泰逢主倍賁之陽幽介何間亦豈必河漢  
仙李曹鄴空桑抑知馮夷屬籍舊隸宏農子晉笙簧嘗游伊  
雒千年孫子尙識武彝百蟲將軍知爲隕散摩挲壞闕少姨  
之碣猶存感慨前和撫父之堆無恙或以旁作穆穆儷八蜡  
於水庸有巖翼翼飭五義於外祀傾絃翻舞嘆酒魚酣聆天  
語而鷦翔候祠官而鷺肅豈合衢謳遂同巷祭抑知驕鯨偃  
息其魚之歎斯微宛虹綿延攀茭之功爰逮然則過函谷者  
表關尹之居游九京者慨隨武之邑況平窺壺藉庇負鼎知  
恩者哉由是礪石割霞庀材毀翼丹甍上而罡風搖元構崇  
而化雨潤鸞廊舞榭飛閣騰檐英姿颯爽版天魔於重臺寶

相矜巖闕殷雷於複室玉龜晨竚銅獸宵寧軸翻慧地儼疊  
革於繚瀛域啓禪河希繪藻乎廣績銘曰於皇 聖清平成  
式廓弓隆効順廣利謝虐於禺東瀕融泄南籥伊古三甕蒼  
茫渾噩陰焰沸爐元氣鼓橐万怪回惶羣靈錯錫宏我先  
聖翠華騰邊式是魚鱗曰固疆索神實用命鳧起爵躍排滌  
赭龕調停望朔北漲南坍如響斯諾繫維神功仰副求瘼於  
鄉於里爰究爰度旱或漢暢疾或秦鵲盼蠶昭融精祇揮霍  
奔走咸來爭斤奮鑿電繞瑰宇虹流丹聖神之來兮文狸元  
鶴酒何澹澹荃蕙蘭葯神之歸兮游衍炳爍婆娑載止或歌  
且粵瑋矣盛儀執事有恪

太子太保文淵閣大學士孫文靖公神道碑銘

高宗純皇帝御寓六十年抱表寢繩握圖陳紀文綏武定謨  
明弼諧帝車中央璣衡歸其旋斡元珪釐正璽琫奉以臚句  
爰是貞元應期俊乂在位戴僅有六文昌開上將之壇呼嵩  
者三少室爲佐命之職矣

聖武膺略作於上斯智名勇功奮於下抑孫文靖公其傑也  
公生有異稟長多咫聞顧蹶岑之水真詬乎尺蠖儵忽之景  
趨悍於脩蛇湛冥逋蕩垂三千年論者謂馬周立談何有憑  
藉韋臯重鎮自爾軒騰而當其儻易詭俗顛賴迂時誰則知  
其直門下省與爲節度使哉卒之英猷旁求才武特達授延  
禧王建福奮略擢旄拜爵受胙雖與奪論定有國史在要其



倫勤卹敕及乎卑外終始靡閒哀榮備至其在詩曰夙夜匪懈以事一人文靖有焉公諱士毅字智冶浙江仁和縣人年四十始舉於鄉乾隆辛巳成進士明年

南巡獻賦

召試第一授內閣中書遷侍讀柴翮鑿雕奇毛刷駿唐署上第無媿賢能魏典秘書皆筦樞密己丑傅文忠公經略緬甸請以公行於時王侍郎景趙光祿文哲皆以中書從阿文成公先後至軍公同官也參卿軍事磨盾風飛抗我顏行荷戈山立鯨函扈帶鬪蠻語於陬隅濫習號鐘諧邊聲於競病魏收邢劭竝直中書班彪傳毅多歸幕府其後光祿著死綬之義侍郎承引年之休獨公以功名勲爵終良由小范胷中自

有武廬兵甲千秋口對多成圖籍山川岳牧旂常權輿此矣  
還京授戶部郎中遷大理寺卿出爲雲南布政使雲南自緬  
甸用兵銅鹽廠商墮運銀至數十萬公奏罷之囚奴來賓寬  
郡國牢盆之禁党項旣拔紆河東礦稅之繁未幾擢巡撫以  
失察總督李侍堯革職旋起爲翰林院編修弱水將沈忽迴  
焱於蓬岸樽木欲燼乃引照於藜光誰謂蘇威頗累臧室久  
諳李絳不獲同僚固知前奏倪寬定非俗吏不意異時廉頗  
近在禁廷故事所無蓋異數也壬寅復出爲山東布政使甲  
辰巡撫廣東劇盜黃某聚嘯至萬人前撫李湖捕殺未盡公  
計擒其魁餘悉解散馘濟南豪猾百數家諸郡蛾伏搜京兆  
少年三十輩餘黨腐奔聞聲色變扑咳唾如風雷望影魂驚

凜威儀於嶽瀆丁未總督兩廣會臺灣林爽文反公備兵潮  
州誓鑿凶門逆屯樂宅氣殷龍積怒歎鱸濤削木梯以蔽空  
揮羽扇而斷渡颯流契箭籠東之徵發如神電激飛芻閭左  
之輓輸不絕璽書褒歎進太子太保其明年安南國王黎維  
祁爲其臣阮惠所逐其母妻叩闕求援公奉

命以兵納之上承

睿算俛咎彝情謂率土莫非臣春秋大繼絕之義懷遠莫如  
德軍旅無專命之嫌虎符未下已徵屬國之兵龍節傳呼便  
送大宛之客赫斯之怒用彰嘉乃之績永歎先世黎氏舊臣  
阮輝宿者上書制府詞致忼恨口絕水漿包胥之哭七日氣  
如虹蜺魯連之矢一函公隸諸戎行資其嚮道傳檄九道飛

渡三江燎熾炭以燔毛沸燂湯而灌蟻風馳象郡草偃駱侯  
正蚣蝟於軒懸總觜觶於葆旅公旣撫定黎城承

旨冊黎維祁爲安南國王并送其母妻還國蓋已逆水迴瀾  
居風向化五百道小夫人之乳弓仗爭投十九年晉公子之  
祛襟裾未改出漢都護已立焉耆絕域武威曾開疏勒捷書  
入甘泉之宮聯句賡

重華之宴

天子以公迅奏膚公克副委任封一等謀勇公方謂義問宣  
昭有征無戰豈知外繇甫撤已走辱王按堵未幾遽空質館  
慨鄭門之蛇鬪竟楚國之猿亡天之所廢其謂是矣或以隋  
何不武公實佳兵裨謚善謀計疏謀野抑知簡在方深龔行

有罰若使單于爭王夙沙縛主將謂宋災之必卹逆料曹社  
之難謀則是威械不御而九伐之法荒畫室無聞而五餌之  
恥甚此不可爲公疑一也至夫鄭夷九縣虛置八家風雨不  
時驗條支之難到牛羊多死知鐵勒之將衰倘欲借託柔逋  
勢兼攻昧亦何難騷除竈上慷慨犁庭酌祭天之金人恣其  
拜舞畫渡河之玉斧隸我版圖震蕩

皇威揆張天討然而突厥好鬪名取兜鍪猗盧無知狀如蟲  
豸雖車師肥美漢不利其屯田卽頡利荒亡唐肯恣其橫草  
固已坐籌密勿稟尺都俞下充國之議三慰昆彌之書四此  
不可爲公疑又一也公入關自劾繳公爵以兵部尙書還京  
爲軍機大臣尋由兩江總督授吏部尙書協辦大學士佐嚮

明之治儲端右之才參攝三司敷贊六德庚戌西藏用兵公  
督理糧餉署四川總督由打箭爐往來前後藏所經察木都  
瓦合丹達山諸險以張廣武爲度支拓地一萬里用令狐彰  
計儲待選士三千人然而轉粟青天揚塵陸海驀坑墮澗鐵  
轄痕消走阪注坡金繩路絕夜半見日銅溝無以正其儀夏  
至零霜玉館何由測其候公則舉霞爲旗鞭石成壘駢駢識  
路指旅竹以南征魚鱉成梁浮東明而北渡地原身壽仙是  
肉飛壬申開山領崑崙之部落戊巳校尉屯伊吾之膏腴遂  
使儲胥所積多於恒河之沙服阜所秣高於葱嶺之阜龍馴  
象伏就交河以洗兵雉竄鷹飛望陰山而慟哭逾年廓爾喀  
平補授文淵閣大學士仍署四川總督乙卯二月黔楚苗匪

滋事公駐秀山旋移平塊勦撫兼施尉侯無失

今上御極之元年公自平塊馳至湖北苗營督師進勦晉三等男爵係越纓長定秦刀大區脫懸邊窮盤古之足跡尊彝鑄象截蚩尤之肩髀攻克茶園溪紅巖堡乘勝抵龍觜三百曲踊七十據鞍天上星辰問文潞公之年歲蠻方草木知張萬福之威名奈何膽尙爲雲鬢先點雪年迫日索正新息之生悲食少事繁詎武鄉之可久流光翁赫帳外之星已沉歎玉哀嘶陣上之騎先殞以丙辰六月二十一日薨於軍年七十有七

上聞震悼贈公爵予世蔭祭葬如禮

賜元纁於行臺轉乘車於左轂疾病五日空中聞甲馬之聲

歎息

九重宵半停嚴鼓之警家無長物樓蘭之劔同殉隧有餘哀  
祁連之塚特起蓋迹邁前勲賞延歿世漢大臣中公一而已  
公典試者三視學者一爲布政使爲巡撫爲總督者三  
賞戴花翎寶石頂黃馬褂

紫禁城騎馬

賜第及匾額

渥恩稠疊度越常等嗚呼公奮庸寒素遭際休明負鼎調羹  
陪階舞羽然自古鰲承六柱撼坤軸以皆驚鯤運八絃扇滄  
瀾而不覺雖鷗蒼大馬頻聞張軌之歌而薏苡文犀豈少梁  
松之謗公獨能舒卷慶霄綢繆晚歲以功名終顧不偉哉公



長子興大理寺評事前卒次衡內閣中書長孫均世襲三等伯年月日葬公於錢塘天馬山以夫人某氏祔禮也銘曰  
公之挺生渥洼奇姿雲謁霧詭轡豹安施惟

聖神武折箠使之公曰致身其又敢辭俶載狀如植鱗  
邱陵馱馱百怪鐫脾蹙機躓垤羣喙詆謨雲單一張變化躩  
踞鋒銛穎利若傅修期九牧踵武八虞繼規入贊訐謨出任  
保釐圖艱若易居危勿疑鞞章農發輶車夕馳宣  
上威德耿光重熙坊身稽首來如渴飢勲固邁倫過亦在斯  
但有甚美

帝鑒厥疵掌武疆場竟卒於師川陸崩鸞霜露繁滋銘功刊  
壁遺愛攀枝賢勞卓犖譽不可訾謚曰文靖侯其禱而

代人祭胡贈君文

嗚呼枯桑號寒夜濤噴雪南望溲留之江孤雲千里風酸肌  
裂垂老淚乾懷遠哀結孰令予之僂佷而徬徨耶慨暮景之  
飄瞥鄰春不歌雍門罷彈繁善人其已逝誰則能立懦而廉  
頑此豈一人之私悼也亦猶瓶水凍而知寒胡君五峯子姻  
婭也彼隱於賈實隱於儒始矜疑於被褐繼感傲於弃繻負  
米於燕趙齊魯之郊者風饕雪虐不知其幾千里也曾何季  
路百里之區區說者謂以君之才使俯首帖括爭勝操觚初  
何難厲垂天之翼驕籟雲之駒乃取脂辱處貳雍伯而參陶  
朱則亦豈未見偉人魁士襟海懷湖歎郎當悲獨漉者流離  
顛躓世之人方且買其櫝而還其珠然則君之操奇贏而競

刀錐也蓋亦猶寄痛哭於唐衢不然如君之磊磊落落爲慕  
義之士何至析秋毫而爭錙銖嗟乎哲人萎矣君之鄉里來  
京師口語手畫話君遺事知君陰德如禹鈞孝友如許武飲  
其德者十十伍伍窮檐之士待以慨脯謂年壽其未艾乃銜  
哀於黃土况某嘅石火之年華迴驚颺之弱羽樹闕霜以成  
秋人閱世以成古悼姻婭之彫衰極遲暮之勞苦燕臺九月  
驚沙飛揚招魂何處夢短天長一聲薤露侑此椒漿尙饗

太學蘇君墓誌銘

士之爲行有偏宕奇詭危苦孤卓或胡談踈醫詞語百車與夫矯異諱同好過其醜所失均焉夫顛顛迕時馳駭驟怪中庸可能形沮勢閔不幸則然萬喙如沸各徇其私豈直詈臺譽亦傷心徒懷桓彬過人之四迺抱稽康不堪者七然則易情簡行俛仰百年升沉無與於已頌謗不及其身可不謂厚幸歟蘇君名汝詔太學生曾祖佑昌贈興化府知府祖本忠贈內閣中書考去疾乾隆癸未進士由庶吉士改刑部主事出爲貴州直隸州知州敦文篤行學者稱園公先生也君生際家慶人倫極盛內無周顛之忤外不聞曾參之疑匪厲何鏑不激何滯愉愉耳矣從宦京師鼓篋橋門游履所及溟池

荳蘭滇陽章貢先奮阮謝登詠之懷後攄禽尚顛白之願孔  
惟守約老契用嗇無欲於人不願乎外彼頽俗急難一壺千  
金浸假相失橫目裂電致足慨也君鑒此耳顧自童卯以迄  
暮齒盎然如春枯來莞往燥濕輕重迎距在心劉整遇嫉之  
刻旣誚其愚許武成弟之名亦逆其僞且曰先大夫之守祧  
在焉烹葵薦菹鏤蠶毋闕可也顏觸抱璞遽瑗保生中郎云  
爾雖甚厚幸抑有道焉由斯以言曩所覩縷謂不幸者可憫  
然反矣君卒於嘉慶十三年十月某日年五十有九娶於陳  
生子安時宗寶后渠逢聖再娶於屈無出九思側室盛出景  
韓朱出也諸孤將以十五年之冬合葬君與陳孺人而乞銘  
於予銘曰

虞山之陰破山北銘曰克家無媿辱慨乎言之質幽獨

西湖新建白蘇二公祠碑銘

夫叔敖灌雩婁之野國喬正封洫之疆限民名田水利尙焉

水均爲遂爰次河渠之書民功曰庸未墜察至之典崇德報

功蕭脂斯在而况韋臯入蜀爲諸葛之後身中丞與白  
傅生同日申徽

移楚圖楊震之畫像太傅遺像中  
丞摹奉祠中貞亮協心今古何間杭郡

山阜阻深原隰交午礪陘失治汚萊彌望今大中丞儀真阮

公申畫多方則壤連軌循農祥之前規懷水庸於曩哲乃建

白文公祠於西湖之濱德施於民祭法有焉先是按察使無

錫秦公創蘇文忠公祠於孤山寒泉秋菊水仙同祠鐵板銅

琶神絃競奏中丞乃卽祠之左別構三楹以奉白公栗主題

曰白蘇二公祠薦浚儀之陸雲表桐鄉之朱邑前召後杜如

協乎壘篋裴雨張晴無涉乎參昴其合祀也固其所也乃若  
校其出處之塗綜其遇合之迹異同略判可得而言蓋厓縣  
尉福昌主簿姚武功宰執之才乃任卑劇仇季智鄉里所舉  
辱在簿書迹其初階非猶風馬一也洎乎召拜拾遺入直史  
館陛下誤矣賴李絳以解顏起居可乎因魏公而帖職委蛇  
之間遭逢小異然而官官言事見折於王涯何殊科舉獻言  
得罪於安石二也至如託志文史娛情歌酒風船水枕俯仰  
之懷彌超竹閣栢堂勾留之契獨喻出李冲於鄭州陂名僕  
射使張謂於沔水湖諡郎官三也文忠每謂平生出處與白  
傅略同寤寐之言勿諠蒼岑之跡相踐至其合祠之故尙不  
係乎此也夫赤緊者地也憲達者才也東濕者勢也以長慶



改元之後視哲宗聽政之年一則恩牛怨李漸開清流之嫌  
一則蜀黨洛朋已啓僞學之禁賞花之譖方深青苗之害滋  
盛乃欲輟作息之勞謀鍾洩之利不格於宰執之消沮亦罷  
於林蒸之况瘁耳卒之石函量水葑田卷雲父老不驚魚鰕  
無恙亦可見神著獨斷智珠在懷於難爲之時行得爲之事  
守土者可以勸矣若夫徹壅通堦先扞錢江之流增卑培薄  
首疏運河之水雖大歷有引湖之井武肅有撩湖之兵而畚  
鍤爲勞沮洳易塞二公之任畎澮者視今日爲校急二公之  
亟偃滯者亦視後世爲更難論世知人君子趨焉孤山舊有  
四賢祠祀唐刺史李泌及二公而以宋處士林逋爲附茲獨  
不及李何歟則以郡守之責莫重於水旱而刑名次之溝洫

之志莫重於隄防而井渫次之是以渠成樊惠溝號張綱崇  
安有清獻之名海陵致文正之頌今孤山屹兩堤之間而盱  
蠶虔二公之祀有以也祠經始嘉慶九年二月越月而落成  
銘曰

以水漑石猶可泐思以水漑民不可泐思

文學王君妻陳孺人權厝誌銘

錢唐文學王君振綱今之潘騎省也妃耦之重彌增乎祥服  
輕薄之笑不改乎盧杖蒺藜之痛何心嬖媿之殞在抱乃自  
爲哀諫之辭慟蛇蛻於九原悲杏殤於七日曰中無釜早驗  
妖徵冰下有人還甘孤處此則和仲所言哀生於愛武子之  
歎情生於文籍非彤管有煒亦何以得此於君子哉年月日  
將權厝於赤山慧因澗之原屬銘於初揆不獲辭

系曰孺人姓陳氏名其順與王君同籍父諱玠乾隆己亥舉  
人辛丑進士官四川溫江縣知縣孺人其次女也妣趙孺人  
前卒孺人才量玉尺名替金瓠麗懷內朗淑儀外潤溫江公  
愛之抱得青琴聞絃第四扶來嬌女如月初三數媿媿之行

應呼卻盜撫纖纖之質亦曰慰情婉嫗之德義方之教斯兼之已顧孺人六歲失母依其姑於胡氏安仁之婦有世親之恩叔允之妻發盛德之歎已而溫江得婦河東言歸吳下父爲齊贅兒號鬱生鏡鑄團欒波名熨帖蓋孺人於是乎始笄矣歲乙卯嬪於王君茲彼泉水興衛女之思穆如清風稱吉甫之誦釵頭賭茗笑覆茶栢燈下分牋爭疏粟事佳耦曰妃詎不粲然而孺人之可錄者不繫乎此也王君文園善病絕贖爲患宛轉牀婆沉綿椅妾孺人覓得牢丸身親藥臼試將指爪手錄方書咒持金輪妝塗椎髻展甄后驚鴻之影屢拜瘍醫問殷人飛燕之卜頻呼竈婢壓勝之錢已盡續命之絲方長蓋至芙蓉遶牀葵花衛足而孺人亦由是病矣加以

片玦墮地一鈴入懷穉筍棚而雷驚奇花胎而霜隕甚至金環在而羊祜不來玉杵留而雲英已去嗚呼殤矣夫齊物之論特莊周之寓言古事之鑒亦陳化之詭旨獨是弔鉛華於旣零想帷屏於鬚仿含椒十年葬玉一昔糟糠之婦何異患難之交乎使真再世之可期反幸百年之易盡宜王君之熒熒然無以喻諸懷也孺人以乾隆某年某月日生生二十有九年而卒實嘉慶壬戌某月日也子一殤銘曰

翩彼良嬪鬱其洪胄善心爲窈昭質在宥居室攸宜君子旣觀邕邕警且膠膠戒晨共食合瓢如藹方春廁牖禦儉賓澡承禋含蕙懷蘭規圭鈇璧駛彼白駒麗爾金格雲衣黯秋月儀掩夕相窆於原在河之澣葛藟爲緘蚍蜉覆繡展如之人

濫焉黃土

濫焉黃土

濫焉黃土

胡五峯先生墓誌

龔氏世爲浙之餘姚人康熙中名心禹者由吳江轉徙至錢唐爲後於胡遂蒙其姓隨會在秦乃稱劉氏莒人立後實曰鄧甥凡五傳至五峯先生諱某字某咫角未生驂駒已耀腐芥不取虎珀能奇鄉前輩桑弼甫侍御亟稱之開明頌二千言重譽於童年孝綽方十四歲聞名於鄉黨累遭大喪遂搜羸疾崔九作孝不禁吹風宋五坦率何堪下第於是百藥爲名五歿自鸞書稱服賈禮繫任商非其志也旣而走齊魯歷燕郢定陶爲范蠡之鄉金原可鑄滑邑有弦高之宅韋亦能將何氏得鉤張氏得算先生有焉處脂旣潤蔭賜尤勞續命田寬崇仁里壯焚一廚之券債不須償運十船之租麥猶可

賻盜牛之名恥聞於王烈失脯之客私媿於桑虞詮其軼事  
槩厥平生先是里中有吳氏者貧不能殯其先弔罕虞翻之  
蠅祭餒若敖之鬼者卅年於茲矣先生爲具葛蒲飾車請黃  
金易擲舉數世之喪白骨如生無半面之識豈故人其腹痛  
直陰德之耳鳴不然則狐鳴髑髏之臺苔塌鹿盧之井雖或  
百里之外瘞老嫗之棺平生之交修死友之墓古人不作風  
義誰敦則先生所爲不可及已兄弟七人先生其第五也讓  
崔挺之宅成許武之名唐棣碑前移花四月鵲鴿原上霜氣  
一天人倫之盛宗族所美先生以禮義爲扞擻以冲粹爲被  
飾貧乃治生富不獨有謂爲儒隱誰曰不然娶於葉生子二  
宗溥候補州同知元杲廩膳生候補訓導以



恩例封奉直大夫卒於乾隆甲寅年七月二十二日春秋六十有六嘉慶某年月日宗溥將奉其柩卜葬於邑之橫山乞爲之名揆辱與其仲子元杲交不獲辭銘曰讀書不成去而就市曰張古人曰宗曾子先生之德如石著墨墨有時澣石不能蝕先生葬人不問姓名人銘先生不乞公卿大江東流將爲平陸善士之幽貞諸深谷

范文學妻陳孺人墓誌銘

子旣爲王君振綱銘其婦陳氏之幽頃之范文學崇階喪其耦援王君之例以爲屬二君皆少年其婦皆以婉亡鈴入懷而未圓電在口而遽震繩牀不輟王摩詰之傷心總帳猶存潘安仁之改服葢葦中懷亦何能已顧王君百兩之御不越里閭陳孺人之亡也煮粥有燎鬢之弟視舍有垂白之親以眎夫萍迹東西菟絲宛轉烏原共命蟲是寄居伯通作客賃杵臼於殊方符融食貧瘞妻子於中野者哀頑略均慘舒迥異則范君所遭爲更窮矣孺人姓陳氏慈谿縣之北鄉人父琪孺人其長女也旣笄歸范君范君鎮海人寄籍錢唐蓮家焉范君嘗爲子言孺人質而不華如玉之璞幽而不艷喻蘭

之芳廁牖必親綸綬不御蠶箔滿簇續火一匱勃谿鮮出戶  
之聲矜娑靡失容之度射牢之譖不聞挽鹿之風彌邇雖曰  
家範抑由性成焉往者與范君讀書吳山之麓范君製棠芋  
之衫不嫌缺鶻鳴豸豚之佩絕勝衝牙魏收夏坐移牀就樹  
范汪夜讀然薪代膏乃有付鏤鑽於質庫佐其盤殮澣淨衣  
於故笥供其題字由是裴澤恩義越宿必歸其家曹女愛痒  
取涼以慰其體所聞若彼所見如此婦德婦功致足傳已嗚  
呼銀蟾齧月而織阿之光沈玉燕墮懷而佗白之氣化以嘉  
慶癸亥八月某日生一女越數日遂卒聞其屬續之夕尙話  
故鄉噩夢之中猶呼老母隕華年於逝水託輕魂於流螢雷  
岸之書未聞永訣衛水之權竟以喪歸嚙其甚矣卒後之某

年歸其柩於甬上葬於邑之某原銘曰

蓉質拒霜蕙性殞烟豈繫含貞不如鬪妍人理旣窮乃疑於  
天甬江之原下不及泉枯鱗掩泣萃羽孤鸞日月有明誌此  
新阡

爰燦文先生墓誌銘

乾隆乙未錢唐爰燦文先生卒後之三十年家嗣光烈自  
粵數千里寓書歸乞子誌其墓子又辱與先生之孫三慶交  
固以爲屬昔者文範之弔第接乎年世邠生之誅不擇乎貴  
賤援是風義形諸謠謠嗟乎陵谷崩竈隕叔子之涕文章流  
別媿有道之碑日月逾邁山河邈若乃祖載之禮迫於郊原  
幽竈之文待諸寒素家範遺規亦概可想先生諱某燦文其  
字也候補州判自其卒以距其生三十有九年娶於范士族  
也以賢行稱子三人長光烈次光照光熙光熙妖孫四三慶  
三耕三晉三口以嘉慶某年月日葬於邑之某原銘曰

伯陵之裔爰始冒淳茂族名世宗英軼倫逸翮鴻翥希聲玉

振恭儉銘被忠信書紳計硯服賈原憲食貧海昌置尉鹽車  
麟駟曰法嚴仲禺筴算緡漉沙煮月熬波煎鱗嚇鼠腐吻退  
鴟茲輪梁春不賃薛券誰焚怒焉首塗乃越河汾於鄭於楚  
爰底於秦百二設險九兩繫民珠鄴受權丹穴效神君於其  
間質劑紛綸地財合禮天爵潤身邈矣幽壤城焉蕭辰巖電  
飄忽桑戶反真九原不作莫此重垠石醬甑以愆斯文

葉宜人墓誌銘

夫巖霜肅而勁，翮厲野燐聚而孤。魄明遇齋者，易彰履順者不暱。岸幘有然，何論不櫛。然則婉變之資，黼黻之工，蕙以弱而風澹，水以漪而波輕。兩鬢之儀類，闔然矣。彤史彫缺，珮環失響。顧德在三，從前徽未。嗟執是權衡，窈窕斯在。抑又有說焉：剪髮爲髻，繫絲設悅，無非無儀。靡得而言，泊乎施衿，胖合地道，無成男不言，內女不言，外淵密之行，何由踰闕。由斯而言，女德茂矣。然而繁條垂柯，不生於朽壤。簡士負聲，必肇於賢母。觀聽所及，詎不亮哉。葉宜人爲錢唐某公之女，同邑五峯胡公之室。椎髻佐餐，蒿簪告儉。處脂不潤，閨禮所難。聖善之教，徹於里閭。長君宗溥，祓飾風采。與世迎拒，鄉黨之士稱

有禮焉次君元杲通介之間薰猶不雜馬子結之弟兄皆涉  
文學王墨首之友愛多取圖書一味之甘必以分餉一尺之  
帛不以自私人倫稱美謂爲二難藉非投杼之教董之於先  
絮羹之叱膏之以微卽殊絕凡庸豈遽至是則由宜人之爲  
賢母聆音識器因颺見樹舉其一隅已概大凡夫希聲不悅  
於里耳貞德彌矐於來今辭繁結實知言尙矣誘誣斯文疑  
懇至再宜人雍正某年月日生以嘉慶某年月日卒春秋七  
十有二卒後之某年而合於五峯公之兆實嘉慶某年月日  
也子二宗溥元杲以

恩例封宜人銘曰

詩不云乎宜其家人宜人乃得之以爲名則已盡七十年爲



女爲婦爲母之生平又烏乎能銘

簞谷文鈔卷十二

海昌查揆梅史著

阮招勇將軍暨光祿大夫昭穆神道碑

國家牟盧六合文武兼資甄陶衆流隱顯竝任乃若高勲跋  
前名德踵後風雲指顧侶褒鄂於行間圖史紛綸坐皋夔於  
邾下父子鴻懿負乎遠哉將軍諱玉堂字履庭光祿諱承信  
字得中兵部侍郎前巡撫浙江名元公之祖父也始祖諱巖  
明神宗時由山陽遷江都門材東渡尙著陳留豪傑南來多  
依淮泗將軍豐軀偉觀軼倫超羣入仕由康熙乙未武進士  
授藍翎侍衛雍正元年晉三等侍衛賞戴花翎三年出爲湖  
北撫標中軍游擊被大將軍岳公鍾琪總督史公貽直薦以

卓異署苗疆九溪營游擊翟瑛薦士舉樂羊於中山子儀論  
功擢渾瑊於河朔將軍之宣力疆場於是始矣乾隆五年從  
征楚苗斯時也銀鵲哀秋蒼鷺出地血滂花門之面髑銜槃  
弧之頭武陵郡縣驚板楯爲神兵巴樊山川震牂牁之鬼鼓  
將軍由三界口至龍家溪數日之間破其五寨穎考叔蝥弧  
先登公孫夏虞殲竝唱纔軍灞上已據壺頭奇兵趣戰饒陽  
之謀先知間道長驅陰平之功最壯於時

上命貴州總督張廣泗節制全軍督戰方嚴摧堅益力流血  
及屢卻克之鼓未停納刀於靴光弼之鋒難犯檀來有識彭  
亡何虜留都督八日而賊平分節度九道以架入渠魁旣戮  
乞降者數千人經略不許將軍以死任之全活無算卒之武

安深坑飲恨於齒劒契苾單騎取信於投戈有偉績焉有陰  
德焉事平陞河南衛輝營參將罷歸揚州十六年

南巡迎覲以都司用二十一年授廣東欽州營游擊卒於官  
春秋六十有五子四長承德次承義又次承信卽光祿封君  
也夫其禦侮之力不溢旗常保世之資必垂弓冶曹武惠不  
嗜殺人而琮璆皆領節鉞韋孝寬累扞疆禦而壽霽竝躋臺  
司則封君豈得指勲州之前烈充隱侯之嘉遯哉乃竟扶掖  
人倫依迴巖壑以子撫部貴誥封光祿大夫戶部侍郎王罷  
之孫足傳畢萬之後必大人理測天又何疑焉先是將軍在  
楚以母周太夫人老命封君侍養居里將軍以百戰之身爲  
五州防禦封君以弱年之息奉八座起居靡盬之懷慰於單

外克諾之義逮乎重親非積習名教安至是耶將軍能文翰  
所著有珠湖草堂詩琢庵詞箭譜陣法諸卷競病兩韻礪礪  
雙聲柳安南涉獵文辭耿都尉博通書記封君承術家巷善  
讀父書丹黃鳩冶之篇祓飾犀函之字今

天子御極之五年撫部殲海寇於温州從封君受方略中流  
擊楫橫海下楊僕之船別墅賭碁淝水奏謝元之捷封君而  
後喜可知也嘗與撫部言招勇將軍征苗凱旋之日方生七  
齡出迎十里遙見旗纛甲騎飛揚迺邏過山而來馬後降羌  
花鬘瓔珞禡牙少吏扈帶鮫函今復見海上之捷蓋六十年  
所矣封君偉狀毅容貞心亮德無忤於世爲善於鄉揮道旁  
之金賻舟中之麥中人所能勿足詳也貽厥嘉謀以匡王國

仰承俛啓莫可儷已春秋七十有二終於浙江官署嘉慶十  
年閏六月也嗚呼哀哉將軍以乾隆二十五年葬揚州府城  
北雷塘中壩以元配汪淑人繼配江淑人附嘉慶十一年月  
日撫部奉封君樞從將軍之兆與配林夫人同窆窆禮也銘  
曰

大江東來清淮西上漢徙豪傑唐圖畫像繩承兩世哀榮九  
壤越宋元明 清朝懋賞將軍纂冑初服振振季路雷精左  
車電神入領五校出典兩甄邳張撻伐天討以申

純廟威德騰圖受璜旌牛絕徼白馬氏羌蠻夷君長稽首來  
王苗民逆命膏我斧斨九疑連綿六詔函閔將軍奮身風驅  
電激蠶叢移窳熊館草檄回洛營開斷蒙刀蝕降人萬衆馬

首呼號令甲所宥開網解條炎方翡翠西地蒲桃詠歌  
聖德功不言高哲嗣挺生有嚴有翼擊劒氣豪較射體直贈  
有暖言賜無儉色道路之人聞名感泣今

天子聖謂汝子賢承

制作誥錫嘏引年福祿具慶宗廟爲先尊薄仁粟芘芘義田  
公詔撫部德在乃祖開嘗出游帆檣荆楚九溪老兵荷殺而  
語羊碑涕洟藥社尊俎將軍武節國史有之封君茂軌  
天子寶之執斧涖匠脉楹刊辭江海滔滔國或替之

天水郡女公子秦氏小傳

女公子姓秦氏江南無錫縣人今太常寺卿名瀛公第三女也母朱淑人乾隆己亥生女公子於京邸佳俠含光陰臣習禮甫離傅婢已判華媵初御盤絲能知姤媿輪困瀛公天吳紫鳳之圖碧落碑銜玉女明星之字宏農郡君矜其被服盈川幼女字以容華蓋朱淑人教也京師士大夫家晏娛之盛華鐙照夜繡幃咽衢如槃銀燭傳籌開打馬之圖似水華年排日赴戲嬰之會太常公始以舍人入直機廷朱淑人佐之庭堪羅雀悅不驚麗佩瑱而澣華闔礙於單門弋綈之衣鄰頗訝其寒女女公子稟有齋之訓誦穆如之詩太常公愛之公由戶部郎出外爲浙江兵備道女公子侍朱淑人行江湖



之上。擢有歌聲兒女之行。鏡無濃笑。蹠蹠采服。錢唐衣錦之鄉。宛轉鍼神禾郡。學繡之塢。嘉慶丁巳。適同邑嵇君文綯。贅於太常公家。朱淑人已前卒。逾數年。嵇君謁選。得湖北來鳳縣典史家本。韋平中更衰替官。纒簿尉僻處蠻荒。壬戌。女公子侍其舅姑之來。鳳太常公方在籍。伯鸞溪邊牽裾腸斷。晉陵驛畔回首神傷。左芬羸疾。素自耽愁。惠姬遠征。能毋絜息。肥泉永歎。孝水將枯。太常公尋自家起。爲廣東按察使。擢浙江布政使。入京爲正卿。女公子先以媿卒於來鳳。楚天似墨。兩昏射蠹之堂。湘水如烟。鬼嘯跼蒿之地。男錢佩後始知爲祆之虺。蛇父書傳來。已是隔生之歲月。乙丑閏六月二十九日也。年二十有七。距朱淑人之亡十年云。方太常公官浙西。

揆遊於公門知朱淑人之賢行公篤元相貧賤之恩增孫楚  
伉儷之重女公子其愛女也俸錢營齋益念郝前弱息良嬾  
短世倍憐掌上遺珠讀公所爲哀詞可以知女子矣

張氏三世節婦傳

予一妹歸同邑張氏五年而寡嘉慶戊寅年四十有二矣貧且病以其家譜系寄予於宣城曰自我之夫夫之父祖皆早世我祖姑及姑以苦節聞今以逮我蓋三世矣我夫又無子我懼先世之澤由我而遂泯也爲我記其名字與其墳墓之所在他日有嗣我者而告之焉予聆其言之悲而無以慰之也作張氏三世節婦傳

周孺人父文在適諸生張溶績學有聲庠序早卒孺人年二十有二撫遺孤三十年年五十一乃卒其子婦周孺人曰吾姑以哀毀得痰疾然教其子方嚴有法度子景筠

祝孺人貢生奎女適太學生潢溶弟也祝氏家法醇謹人稱

孺人有大家風。演卒孺人年三十又五十一年卒。與周孺人  
不相能。異宅居。潢無嗣。燾爲孫。燾寡兄弟。義不當出。後謂  
姑嗣之。嫉有二子。則以其一。後孺人爲曾孫而燾又死。

景筠婦卽周孺人姪也。父春進士。知廣西岑溪縣。通儒廉吏。  
士民愛之。孺人奉庭訓。嫻禮法。事姑謹。景筠卒。孺人年三十  
景筠讀書入州庠。譜系散佚。手輯爲一編。并及母族甚賅。備  
子婦查篋藏之。猶得知其世次焉。孺人撫七歲孤子。燾旣成  
立。舉三世之殯。葬於州東鄉之赤兔嶺。

查孺人父州庠生某年二十歸。燾婉婉能事其姑。周孺人嚴  
然以婦賢篤愛之。燾體羸如其父。又家世孤子。生產日落。不  
能卒業於章句。以喉疾卒。孺人年二十有二。有一女。旋殤無

募功親推及服盡繼一子又殤與其姑日夜哭念姑老斥其  
產以營葬其夫并爲姑生壙期他日以已耐焉張氏三世溶  
卒年二十四潢年三十二景筠年二十熹年二十六

論曰予嘗過張氏所居在堰下待軒先生故宅也待軒名元  
帖與朱康流切礮講漳海之學爲邑耆宿至今稱梅花書屋  
張家云自待軒至溶第八世皆忠厚無佗過失而其衰歇如  
此卽謂有涼薄者吾不知顧以婦姑三世之貞孝節行垂七  
八十年而轉令一綫之傳忽焉斬絕嗚呼何其酷也語云天  
道遠人道邇求之於人道之窮而不得伸其說此淨屠氏因  
果輪迴與夫地師龍穴砂水吉凶衰旺之言所由日沸而不  
可止與

董母王宜人家傳

宜人姓王氏江南贛榆縣人父右序爲邑耆儒謂其女賢謂文學董某才遂婚焉宜人年十九歸文學以孝聞翁姑外無間言累遭大喪哭盡哀祭葬盡禮避文學者亟稱宜人也又十七年宜人年三十四文學邁奇疾露香祝請代卒不起有子三又二十七年卒年六十有一方文學之屬纊也謂宜人曰死生命也不能見諸子學成死且不瞑勿亟葬以俟其成也而筮焉可也故宜人教諸子嚴怒欲有所懲輒引至柩前涕泣而榘楚焉長子樹入邑庠次子梁嘉慶辛酉拔貢生授知縣宜人教也宜人性厚嘗訓諸子曰吾寡也汝輩幼孤邁閱受侮其常也吾懼汝之校也姑之姪貧不能有室宜人

出警珥爲論婚曰吾可以見吾先姑矣宣城縣前令呂某歿於官其孤不能舉其喪宜人謂梁曰人皆人子也父死而不能葬人將謂其子何汝同官亟資之爲賢者倡由是呂某子得以其父匱歸嘉慶二十四年

覃恩贈文學如其子官贈宜人亦如之

論曰禮大夫三月而葬未有遲其匱以待其子於成人者也雖然人子固無一日敢死其親者禮虞而立尸有几筵卒哭而諱生事畢而死事始然則未葬以前不忍死其親皎然矣宜人奉遺言停其夫之匱數年以督諸子使其子於不忍死其親之日儼然如親警欬色笑而教之也者其思慕感發自奮於學當何如耶且禮三年而葬必再祭凡筵宅卜葬不從

則再卜筮如初亦未嘗必以三月文學之葬旣未遠於禮而藉未葬以曷其子其用意轉能與禮經相發明可不謂賢毋乎哉古者復命於殯升自西階奔父母之喪亦升自西階說者謂出必告反必面之義行之於親歿之後又可以文學遺言爲非禮邪



六安州知州徐君家傳

君名豐字約之世爲會稽縣人明天啓初四川長寧縣主簿守縣城殉奢崇明之亂諱大禮者君七世祖也事具明史會祖衡臣祖祖望父文達皆以隱德稱君少有幹才年十七游學入蜀屬川楚用兵嘉慶元年湖北來鳳縣教匪起君以鄉勇二百人謁軍門乞自効督師孫文靖公奇之檄以所募赴楚咸豐縣鑼鍋坪防禦二年四川教匪王三槐等起檄赴達州軍營入軍需局引例以縣丞累署南溪縣及邛州判以能名軍興地方輕重異宜大府請升達州爲綏定府改吏目爲經歷卽以其官官君綏定府之有經歷自君始也敘勞以知縣擢用補內江縣十三年調署重慶府巴縣重慶扼荆楚上

游爲川東重慶兵額一千餘名獷且窮其初借月餉自給久之不繼則將弁議月借米二斗估其值以取償於餉然官買米多貸錢貸有子母亦取償於餉如有年而兵益困益不逞且譁先是重慶有教場地曠衍小民趁逐爲市易漸稠密黥者私取其租以自肥爭攘訐訟吏不勝其擾君旣至廉得其故具文書上大府請以租屬官官設簿籍計其入贍兵食月一斗黥者嗾將弁訴不便且言果行之有變君毅然曰公等以我減其米邪向之二斗責償於餉今一斗雖減不責償責償則無餉不責償餉固自在且月多食一斗米孰愈吾爲兵計耳果譁我任之遂力言於大府旣放米皆踴躍曰徐公活我總督勒侯固知君才至是愈以爲可任亟以卓異薦君

旋以憂去勒侯亦還朝每歎息用君未盡云服除謁選爲安  
徽涇縣河南滑縣用兵奉檄至亳州辦理糧臺事竣調懷寧  
尋署六安州州故沃壤脩水利獨是年大禮例乞賑君履勘  
竟與州人議官賑吏役得爲姦弊錢賑口多寡有影射粥賑  
則真饑寒羸弱所全者多今錢與粥竝行不乞帑而各賑其  
鄉黨鄰里貧者不流爲盜賊則富者以安且賙卹義也皆曰  
諾乃使次第署其所輸於籍又給門牌大書其輸之數得白  
金十萬兩有奇君以饑民可散不可聚使鄉先生里老各任  
其散錢煮粥於其鄉而官稽其成凡三閱月金無虛耗戶無  
虛口官吏拊循無虛事爲鄉保一百六十戶十數萬獄訟衰  
息斂攘不作閭閻恬熙忘其所苦是役也安徽旱災五十一

州縣衛甄敘勞動君第一大吏以聞

上嘉歎允以同知直隸州升用先換頂戴尋實授六安州逾  
年以病乞罷丁母憂一起署霍邱縣又以疾解事君嫻於吏  
治所至如學校城垣津梁無不修舉卓犖負時望顧自修飭  
戒盈滿年甫五十卽翛然有塵外意自署所居曰退齋遂堅  
不肯出云

論曰子與君皆被節相百公及中丞胡公薦君以治行尤異  
顯顯於時獨善子以次女爲子仲子婦君長身鶴立慷慨能  
任事論議多中肯綮嘗燕談及史事君輒舉涑水通鑑是非  
疑信具有本末子敬謝焉因言少廢學及作官稍閒暇繙閱  
諸史欲以考鑿得失助其才所未及然則君爲政之美有以

也夫

河東君墓碣

自昔扶風設絕不聞窈窕之名厭次應諧乃託宛若之迹靡  
風壤俗駢服六朝夸飾畸行竿濫八代魏成君去乃有朝雲  
伶元妾來何嫌通德或謂侍干牛之巾拂則反手者三上鴟  
夷之葦杭亦效顰者屢抑知穆姜再拜賦綠衣之卒章息媿  
無言拒湘宮之萬舞葑菲下體簫勺暮年如河東君者抑亦  
難矣君生稟異質歸并英流姓本盧前誼從錢後竊以信陵  
醇酒婦女多歸北部黨魁菜傭知慕羣議所趨非云清尙迹  
其通識別有慧因夫深山大澤實生虺蛇幽阜單岑非無荃  
蕙宏光之際鞞鼓驚花房隘閉月誰言趙鬼能讀西京亦有  
吳姬爭歌南渡或天魔舞豔忽沈劫鉢之圖或神女行雲已

泣灌壇之夢君獨慧觀擾擾妙悟如如依顏特進頌歸心之  
篇就雷次宗發往生之願彌戾之車跳出頻伽之瓶餉空張  
蒼則肥白如瓠有仍之髮光可鑑歌舞疑仙冠巾說法我聞  
之室其筏喻乎若乃首陽何拙柳下爲工野史亭空獨雪遺  
山之涕通天臺迥空銜初明之悲梧桐秋雨擁髻而泣漢宮  
山鬼女蘿挾瑟而歌楚調內無可以託妻子之張堪外不聞  
有致生芻之徐稚顧獨能涕淚飾巾從容引袂無如伯姬下  
堂之言有逾尾生抱柱之信嗚呼何其烈也君墓在虞山之  
西麓拂水山莊遺址也其前爲秋水閣其旁卽耦耕堂枯桑  
知風土偶諄雨孤邱旣墟蛾壤屢蟄煙溼露迷螻鳴蚓弔訪  
其後人僅有存者予友錢塘陳君文述來治縣事徵文獻聞

幽微棄瑕崇瑜遺濁表潔披荆改松命全樹阜所以慨陳迹  
嘉晚志也旣封植矣授毫於子略其冶豔進於貞正庶幾齊  
女有冥漠之侶枚生非優俳之體



候補縣丞林君墓誌銘

子初至畿輔遇林騎尉安祖於清苑氣岸傑立門蔭影炳承  
武功之爵騰劇邑之譽蓋贈某官湖北候補縣丞諱江之長  
子也辱以知言覲光先烈日月既久譴諉益嚴循諾摠愫敢  
銘其幽按狀君諱江字方舟世爲浙江紹興府上虞縣人曾  
祖陞元祖必鉉父大椿湖北東湖縣典史以軍功擢知縣誥  
封奉政大夫君抱鬱流峙涵負星緯寢饋握奇之經企竚太  
常之美宅幽阻險詎喻其量躍奮羽未之或先甫自擲干  
脫穎亟濡迹於請纆可謂壯矣先是奉政在東湖尉任嘉慶  
初元教匪煽誘薪傳穎臺燄熾湖湘肆掠宜昌府屬長陽巴  
東郡城戒嚴奉政解巾登陴執冰勵衆縱橫隻箸籌畫儲胥

綢繆萬戶安輯井竿智有飛鷲之應守無墮雉之虞俘獲相  
仍繫縲彌望或連染於草薶或周納於雀羅奉政辦別矜疑  
蠲除酷毒請於所司全活千計拯蠱蝨於沸鑊拔薪樵於蕭  
斧以此陰德兼綜辛勞未及一年遂擢令長君恭承鯉對健  
作鴻鸞琴鳴廉於七絃弓傳觀於四座遵例以縣丞投効軍  
營吏能開敏時事激昂豈云談兵趙括遽學趙奢抑由請老  
祁奚克知祁午盛府初開異軍特起作荆楚快手驚終賈少  
年意氣直遇霹靂而鬥功名欲度驪駒而前迺沸騰祆社呼  
嘯神叢竟犯顏行孰稱敵愾君與參將王作明巴東縣知縣  
黃應文遊擊田倫遇賊於長陽縣之斜角石勢燎羽毛煙掃  
蝨蝓甘寧見敵聞咳唾而皆驚游楚突圍唱輓歌而深入功

在剋日食待崇朝豈期蛾伏驟起蜂屯檣杙多號鬼兵渡羅  
能雨甲仗血淹裹革氣盡同袍三段槍殘一壺矢盡與黃君  
等力戰遇害嘉慶元年正月十有八日也年二十有七一身  
是膽九死留皮何其烈也嗚呼方事之毀非無才技或誰起  
於帷幄或鶚薦於鄉兵每因攀附卽藉騰驤豈盡効於折衝  
多相引以與援若君之怒鼂式路勁草當風以卓魯之才而  
未膺其地比巡遠之烈而不有其官授命如歸致身恐後以  
視等儕能無慙泚事聞賜卹如例君配某氏封 人子安祖  
世襲雲騎尉改官直隸知縣以嘉慶某年歸葬君於某鄉之  
原銘曰

宦也其才死也其志泚泚武節自過庭始行水之濤越臺之

土澗有時絕土無時腐滂銘其幽塋焉終古

章太孺人家傳

孺人氏楊父書倫世爲嘉善縣人篤愛孺人擇所字見同邑章贈公蟾某以爲才遂以孺人來歸贈公年少力學有聞家貧授生徒養親孺人生素封家不以華贍自倨事尊章一如贈公所以事其親者躬自爨汲以織紵佐不足一家怡然不知其貧也贈公承其世父編脩愷家學爲督學使朱文正公所賞而淹蹇以餼廩生歿孺人悲其志欲身殉之姑江孺人慰之曰若死其夫可矣如若子何是宗祀所繫吾二老何靳焉時孺人年三十有五一子雷四齡耳乃雪涕起曰然誠非我死時矣三年持翁喪又三年持姑喪赤手營殮莫勿之有悔雖贈公存無以加焉孺人性肫摯而恭儉有家法教其子

雖甚愛之不少假先是贈公父北山先生恂所居一夕不戒於火鄰翁驚起欲赴救問誰氏曰章北山家曰是家世善良法不當有此毋庸往也乃復卧火亦旋熄爲鄉里所信重如此未幾雷以嘉慶戊辰舉於鄉道光壬午成進士謁選得直隸雞澤縣就養之官舍日以廉儉爲訓曰耗官財重得罪耗民財則民不堪且汝心安乎聞撻楚聲則愀然曰吾不願汝博能吏名也飲食衣被如家居時子婦以新衣進曰自吾至爾家未嘗有此卻不御不事佛而中年卽斷肉曰唯焚香端坐言笑不見齒惟諸孫戲於前輒喜曰吾家兩世寡兄弟今羣雛粥粥或吾生無大罪過乎疾革戒勿以華服殮年七十有五 覃恩封太孺人

論曰自古賢士大夫由母教者多係其家之盛衰滋重也揆與雷爲文字友又同官一郡見其爲政不務赫赫聲薄刑笞省徭役民多安之其俗每元夕婦女得入縣廨見縣公母妻爲喜孺人壽顏逆之餌以饒果與老言慈幼言孝皆歡忻以去及其喪也邑婦爲皆涕洟失聲於戲雷雖欲不爲良民更得乎

先妣朱太宜人行述

嗚呼自吾父之棄不孝等十年矣不孝侍奉無狀無由致一日潔白之養泣血摧肝何以自立唯念吾母之壽而康也不孝等夙夜兢兢承迎色笑庶幾所抱痛於吾父者於吾母一慰之也乃罪深孽重無復可追而又奪吾母不孝等何地可以自容耶嗚呼痛哉吾母五十年爲婦爲母之賢行以不孝之故無由致顯揚而又冥然不知匍匐哀號以聞於先生長者使吾母之賢孝慈惠宗俦姻婭能知之而子若孫不能言之也則不孝之罪戾滋甚焉苦次昏迷濡墨和血謹述大凡不能文亦不敢飾辭以厚誣吾母也嗚呼痛哉太宜人姓朱氏世爲海寧人曾祖諱某祖諱某父諱龍田



勅封脩職郎晉贈文林郎四川岳池縣知縣母陳太孺人

贈太孺人陳太孺人生二子五女太宜人行第五乾隆己丑

年二十二來歸先府君於時先曾祖母朱太孺人方在堂太

宜人嚴重寡言笑朱太孺人謂似已愛之太宜人奉朱太孺

人教數十年不敢忘每春秋祭祀及歲除元夕展對遺像輒

呼不孝等語朱太孺人軼事至泣然泣下今年元夜諸孫遶

鄰嬉笑忽謂不孝揆曰先祖姑之歿也及見曾孫先姑徐太

孺人不及見而王太孺人見之四世同堂者兩代矣今余年

逾七十何時使我抱曾孫乎不孝揆以大兒世燮入學後與

娶婦對太宜人不語久之嗚呼豈知太宜人之意若有見於

幾先者而黯然言之不孝固未之喻也先祖芹齋府君家故

豐以墓田致訟累年家日落先府君自游庠後咯血間歲一作不能問生產先祖好善樂施予先府君亦如之嘗風雪披裘出及歸裘無有矣太宜人問之太息曰如許寒吾友過午未舉火脫與付質庫耳又嘗晚歸有醉者倚墻立若癡燭之識其人度其抵家遠且所經多溝渠懼其溺也掖之歸及其門而還其他急人之急多類此或一時倉猝無所得太宜人以釵珥佐之勿吝也乾隆五十年大飢太宜人率第三妹及一婢日夜紡績以其餘糶於市飯不足則以菜羹粥餬口不孝揆所食米七之菜三之不孝勲及妹反是至太宜人則有菜無米矣每舉箸告不孝勲等曰吾非溺愛汝兄汝兄方夜讀也嗚呼今日卽嘗鼎百鸞羅列厭飫於太宜人之前猶不

足以抵榮羹於萬一尙可言哉尙可言哉第三妹歸張氏二十而寡苦節已二十年卽太宜人率以紡績與不孝等菜粥餬口者也不孝等初受句讀自塾歸輒就太宜人紡車側讀太宜人紡至四更讀亦至四更以爲常甲寅不孝揆入州學旋食餼以詩文辭受知於少司寇秦小峴先生及官保尙書阮芸臺先生甲子舉於鄉出座主少司空潘芝軒先生大司農盧南石先生之門明年試禮部下第留京師充實錄館謄錄官十二年全書告成議敘超等引見以知縣用分發安徽乞假歸省於是先府君年六十子婦諸孫奉觴上壽太宜人卽以內政授冢婦蓋自此不問家計矣己巳先府君棄養不孝揆自皖聞訃匍匐歸里服闋仍赴皖省歷署懷遠縣巢

縣擬迎養太宜人以路遠且陸行畏車馬之勞不肯行泊至宣城不孝懃恂始得奉板輿至署嘉慶二十一年三月也太宜人飲食起居如常神明不衰見者皆以爲年壽正未有艾先是不孝懃恂未得子太宜人心憂之去年七月不孝揆舉第三子而不孝恂先於三月舉一子不孝懃亦於十二月舉一子一年內得三孫而不孝懃不孝恂則皆第一子太宜人尤以爲慰也至戚密友稱慶者踵相錯太宜人加餐飯顏色悅豫無瘁容今年二月冢婦吳猝遭喉疾死太宜人晨起驟聞之驚且慟時時撫尸哭禁不令撤帳焚紙鏹曰吾不信婦之死也終當甦耳又時時抱幼孫哭於其靈見遺挂則又慟曰兒幼不識母見畫像如見汝母今畫像絕不肖兒他日又

何從識汝母邪言又大慟不孝揆密戒兒女勿哭又強爲歡  
笑以慰太宜人又數日家書至聞四舅氏之赴而不孝勲所  
生子一月而殤不孝等匿舅氏之喪不以聞然太宜人終太  
息侘僚不能已三月十四日晨起患霍亂嘔痰碗許色深碧  
不孝等竊疑之醫來言悲傷之後老年氣滯有積食無大患  
顧攻與補均不可擬以和胃止嘔而每藥輒嘔痰亦如故至  
十六日痰漸白嘔亦尋止以爲宿痰已去也而氣逆胃次瀝  
悶脈散亂舌縮參苓亦不受矣太宜人少年憂鬱勞悸三十  
後遂成痞塊時作痛苦比三五年疾若失方吐碧色痰時不  
孝揆心疑痞之所爲顧無術以治之則太宜人竟以憂鬱勞  
悸之所積而逝也嗚呼痛哉太宜人秉承家誠動循矩矱且

至性過人累遭三年喪哀毀逾常持家教子嚴謹有法度親族交稱爲賢孝也先府君晚年好二氏多方外交常訓不孝曰因果兩字爲解釋冤愆言之故人負我而以爲因果可也我負人而以爲因果不可也因緣兩字爲印證心性言之故與人爲善而以爲因緣可也與人爲不善而以爲因緣不可也不孝謹識之太宜人初至署稔知不孝揆勤慎無妄作而馭下校嚴從容謂不孝曰汝不枉法而欲使吏胥不枉法汝所能也汝不愛錢而欲使吏役不愛錢非汝所能也不孝揆謹識之與先府君之遺訓曰三復之以自省焉嗚呼不孝等讀書勵志仰承家訓亦冀克自樹立以綿先澤而慰慈廬孰意吾父之歿甫十年而不孝等又爲無母之人耶痛哉痛哉

太宜人 生乾隆丁卯年七月十五日申時歿於嘉慶戊寅年三月十七日酉時享壽七十有二 太宜人子三人長不孝揆娶吳氏太學諱有榆公女次勲國子監生娶鮑氏次恂候選從九品娶俞氏女一歸同邑張壽孫四人長世燮次世炯揆出次世不孝恂出女孫一不孝揆出苦困昏迷語無倫次伏冀當代先生長者採擇嘉懿錫以銘誌不孝等世世子孫感且不朽

吳宜人行畧

宜人姓吳氏名慎海鹽人先世以忠節著明崇禎間諱麟瑞者宜人其六世孫也會祖諱朝銓祖諱儀洛父諱有榆母祝氏家法醇謹爲時所稱子旣冠日益貧先君子病太宜人紡績給一家食恒不足子嘗冬月被葛袍過市門然跣踵不肯就帖括縱酒好議論暇輒爲詩古文詞以自放恒不爲人許子固未嘗許人也吳子安子修兄弟獨善子子安爲子媒於佗氏不可遂以其第九妹來歸卽宜人也子安謂子論議清剛伉直敢於有爲他日其人與文必皆能自立噫豈知三十年來負我良友者如初而子安亦病且老矣宜人稔知子貧嫁時衣皆布紵子迎以小筍與與夫索值多靳之則易以做



車往坐處皆穿破數日後爲子言之無愠色也先君子謂宜人貌厚有福澤宜子孫顧宜人自厄於產而驚驚而病病則又厄於產者再且子自婚後輒出游數百里外不卽歸歸亦不越月卽去由是七八年離別疾苦觸處皆無聊賴嘉慶甲子子膺鄉薦明年游京師下第不得歸者四年比乞近需次皖江旋以外艱歸服闋再至皖宜人乃奉太宜人來就養於宣城官署二年矣疾將作前一日子自外歸宜人方弄兒太宜人前太宜人新買小婢宜人爲手紉衣褲言於吾母明日當爲易新衣也是夕飲啖如常四更喉痛微嗽子欲起視禁之言明晨自愈耳一時許喉破嘔紫血塊二始知爲喉蛾倉猝無所得藥然以爲旣破則毒出當無礙宜人亦自以此慰

子明日醫未至痰湧聲如曳鋸危坐逝矣嘉慶二十三年二月二十有九日辰時也嗚呼宜人歸子凡二十有四年子自炙硯出游及留京師需次皖江夫婦彌月之聚甚尠比來宣城纔二年耳計二十四年中之團圞昕夕者蓋不過十之三也傷已宜人謹厚知大體處家事能決斷于客游久奉舅姑勤慎無失禮事子甚敬凡子所服用必親自點檢不假手婢媪偶卻之輒曰此秀才娘子分內事耳君獨不記脫綿半臂時耶蓋宜人初歸子時值冬夜子方讀書宜人執鍼繡坐寒甚宜人故有綿半臂不肯著問之曰我煖君獨寒不可也子好飲好與客飲每典質供酒饌而自待恒刻苦不妄用一錢在官署兩年無一語及錢者身後搜衣篋舊衣裙二十餘件

卽資以殯殮無所餘生三子一女皆自乳幼子生甫七月其  
亡也兒啼索乳於靈牀之側聞之懷斷於是歎清刻自勵之  
無益於人也課子嚴四書詩易多自訓之間作小詩有琴勝  
軒詩百餘首子嘗序之在菽原集年四十有五弱於余四歲  
長子世燮原聘汪文鴻女今聘常熟邵廷鑾女次世炯聘六  
安州知州紹興徐豐女次世煊天女一